

Protocol no. 114**Sezzüda da lündeschdi, als 8 da december 2014 08.30h - 11.30h**

Preschaints: Albert Mayer, Andri Poo, Men Caviezel, Dumeng Jann, Marianne Werro-Lehmann e Marco Fallet (protocol)

Pro la tractanda no. 1017 il manader tecnic, Chr. Poo.

Protocol

Il protocol no. 113 da la sezzüda da gövgia, als 4 da december 2014 vain approvà fond alchüns adattamaints.

1017 021**FABRICA****A. & A. Bodnar-Jenny; chasa no. 19-A, Plazzetta, parcella no. 372**

Il manader tecnic preschainta la fatschenda. La dumonda pels müdamaints dal proget es uossa finalmaing gnüd'inoltrada e las pretaisas gnüdas fattas davart dal cumün sun accumulidas. Previs es però ün'ingrondimaint da la lobia, quai chi chaschun'il fat, cha la dumonda sto gnir publichada. Ultra da quai es da manzunar, chi manca la dumonda pella pulizia da fö sco eir las cumprovas pellas valuors d'energia.

Il schef da fabrica ed il manader tecnic propuonan chi dess sco prüm gnir miss in uorden ils trais puncts pendants manzunats survart e cha pür lura dess gnir decis in fatschenda.

Il capo es però da l'avis, chi dess gnir decis uossa, sco fingià tractandà, supra la concessiun dal permiss posteriur pella sbodada e latras eir pella fixaziun dal cumanzamaint da fabrica tenor decret dal giurist. El es da l'avis, cha la dumonda avantman po eir gnir trattada e decisa cur cha tala es cumpleta e madüra per ün permiss.

Davo lunga, viva e vasta discussiun decid'il cussagl, da metter inavo la fatschenda e da proseguir seguond proposta dal schef da fabrica e dal manader tecnic.

1018 021**FABRICA****Jon Peder Benderer; chasa d'abitar / collaudaziun**

A chaschun da la collaudaziun es gnü constatà, cha'l patrun da fabrica haja ingrondi la surfatscha da l'abitaziun i'l plan suotterran. Sco prüm vegn uossa concess al patrun da fabrica l'udida giuridica. Davopro ed in basa da quella gnarà lura decis in fatschenda.

1019 9**FINANZAS ED IMPOSTAS****Preventiv 2015 / quint d'investiziun**

Il capo, A. Mayer, infuormescha supra la sezzüda dal cussagl transitori e dal nouv cussagl cumünal. Id es da manzunar, cha la contribuziun da fusiun da fr. 10 miu. vegn ütalisada per pagar debits e na per investiziuns.

Il preventiv 2009 – 2013 per nossa fracziun prevezza investiziuns nettas da fr. 1,2 miu. l'on. La via da basa Sur En, previssa cun fr. 300'000.00 es gnüda sistida, causa müdamaint previs dal proget. Eir pella sanaziun dal clucher da Sent es be previssa perintang la somma

da fr. 15'000.00 pel proget e la somma d'investiziun da fr. 1,5 miu. es gnüda suspaisa e gnarà, cur cha la fatschenda es madüra, eir etappada.

Il problem per Sent es, cha schi's voul realisar il proget da las punts penduossas in Val Sinestra, ston perincunter gnir etappadas obain suspaisas otras investiziuns previssas, p. ex. la sanaziun da la chasa da scoula.

Il vicecapo, A. Poo. piglia qua posiziun: Il proget s'ha splajà a plaina cuntantezza ed eir ils cuosts correspuondan plainamaing al preventiv. Pel 2015 es previssa amo la somma da fr. 1,2 miu (s-chodamaint e ventilaziun). Quell'investiziun nu po be gnir etappada pella mità sül on 2015 e pell'otra mità sül on 2016, i dependa dals geners da lavuors, voul dir ch'ev. croudess la somma da var 900'000.00 in ün'etappa ed il rest in ün'otra. Ultra da quai sto gnir manzunà, cha la posiziun da las fanestras es fingià gnüda surdatta e quellas sun eir fingià postadas. Il medem vala pella ventilaziun, dimena i nun es uschè simpel da sistir e metter inavo lavuors fingià inviadas e per part realisadas. Pervi da quai nu sun ils respunsabels pel proget pronts d'etappar amo la part restanta da quel proget. Ant co s'exprimer per ün'ev. soluziun voul el far ils sclerimaints adequats cull'architecta e pür là as vezza schi'd existan pussibilitats.

L'urgenza da las punts penduossas es gronda, causa la sgürezza da persunas e causa la grond'importanza turistica. Il capo manzuna, cha la somma d'investiziun pellas punts penduossas s'amunta a fr. 500'000.00. Davart dal cumün da Ramosch es gnü asgürà (fintant a bocca) la somma da fr. 100'000.00. Davart da la gruppa da god pon gnir effectuadas lavuors, quai chi chaschun'eir cuosts plü bass co davart d'üna ditte d'utro. Peter Kruit da Sinestra ha asgürà da prestar lavuors pella somma da fr. 20'000.00.

M. Werro s'exprim'in möd cha las punts penduossas sajan da grondischi'importanza truistica e chi saja da dar a quellas la priorità.

A. Poo agiundscha chi nu's tratta là be d'ün'importanza pel cumün dimpersè eir sur quel oura e ch'uschè stuves regner interess in fatschenda eir d'otras varts.

Il cussagl riva a la conclusiun cha'l capo dess propuner al cussagl transitori da resguardar in mincha cas il proget da sanaziun pella chasa da scoula culla somma cumplaina da fr. 1,2 miu. e da til presvader, ch'our dals motivs manzunats survart dess in mincha cas gnir resguardada pel on 2015 üna prüm'etappa dal proget pellas punts penduossas.

1020

DIVERSAS SCHEFS

Proget sanaziun infrastruttura a Davo Stron

Il capo, A. Mayer, chi d'eira gnü incumbenzà culla guida da fabrica surdà al cussagl il rendaint final da l'ouvra, chi'd es gnüda conclusa. Ils cuosts s'amuntan a fr. 579'674.60, quai chi correspuonda exactamaing al preventiv (fr. 584'410.65). Quels s'inclegian sainza la lingia da forz'eletrica e da la Swisscom. Inlus quai s'amuntan ils cuosts a fr. 643'278.85.

Copchader pro l'entrada da la chasa Misoch

Il cussagl decida da mantgnair la sporta dal copchader cun munaida be dadaint la porta d'entrada. Il volüm annual da copchas s'amunta tanter 2'500 e 3000 tocs. In quist sen vegn infuormà al nouv cumün da Scuol.

Presidents da societats / sezzüda

M. Werro manzuna, ch'ella prevezza d'invidar ad üna sezzüda als presidents da quellas societats chi survegnan üna contribuziun annuala dal cumün, dimena soc. da musica, IG-Sur En, Grotta da cultura, SÜP-soc. ad ütil public e la soc. da Turissem. A la sezzüda sun eir invidats ils duos cusgliers dal discasteri dal nouv cumün fusiunà, Reto Pedotti e Men Duri Ellemunter. Il böt es chi po gnir surdat a quels duos las infuormaziuns necessarias sur dal möd ed agir in fatschenda, uschè chi funcziun'eir a partir dal 2015 senza problems.

Sent in 60 minuts / tablas

M. Werro infuormescha, cha P.E. Grimm e Cla Sarott s'han ingaschats pel adattamaint dal text tudais-ch pellas tablas previssas da montar vi d'alchünas chasas. P.E.Grimm ha quai fat in möd gratuit, quai eir causa si'incumbenza da la cronica da Sent.

Rapreschantant d'agricultura per Sent

M. Caviezel rend'attent chi sto gnir destinada üna persuna pella rapreschantanza d'agricultura. El s'occupa da la fatschenda.

1021

ORIENTAZIUNS

Surdar pendenzas

Il capo, A. Mayer, rend'attent, cha minchün dals cusgliers chi ha pendenzas dess pisserar, cha quellas gnian surdattas als novs cusgliers tangats in möd cha la cuntinuaziun da quellas fatschendas saja datta i'l nouv cumün.

Servezzan da lavinas / rapport da la cumischiun

Il president, Cla Rauch, ha inoltrà al cussagl seis rapport dal servezzan da lavinas, inviern 2013/14. Il cussagl piglia cogniziun da quel. La dumonda es qua co chi giarà inavant cul servezzan i'l cumün fusiunà. Ils respunsabels han decis da cuntinuar pel mumaint sco fin da qua fin chi nu vengan trattas otras decisiuns. Il cussagl nu vuless interlaschar d'ingrazchar a tuot quels chi fan part illa gruppa per quel grond ed important ingaschamaint a bön da nos cumün. El tils giavüscha inavant satisfacziun e bun spiert d'ingaschamaint.

Parzella Costa da Tiral (Soblantin) / Georg Salamon

Quel ha inoltrà sia demischiun sülla fin da l'on 2014 da la fittanza da la parcella no. 951. I's tratta d'üna parcella da pas-ch cumünal. Il cussagl decida da publicar la fittanza i'l prossem ed ultim Mas-chalch.

1022

VARIA

Quist es statta l'ultimischma sezzüda dal trienni 2012-2014, mo eir l'ultimischma sezzüda d'ün cussagl cumünal dal cumün da Sent e pel chanzlist l'ultimischem protocol ch'el ha scrit. Il cussagl decida d'ir a giantar e da far impringias sün quist mumaint resp. evenimaint istoric.

L'actuar:
Marco Fallet

Il capo:
Albert Mayer